

人境廬詩草

政死於暴客等一死徒死何如舉大計一時嘯聚八千人各負長刀短銃至赤囊傳警舉國驚守險力扼熊本城雷池一步不得過天網所際難逃生十二萬軍同日死嗚呼大星遂隕地將軍之頭走千里將軍之身分五體聚骨成山血作川噫氣爲風淚如雨此外啗嗚叱咤之聲勢化爲妖雲爲沴氣騎箕一星復歸來狼角光芒耀天際吁嗟乎丈夫不能留芳千百世尙能貽臭億萬載生非柱國死非閻羅王猶欲齧血書經化作魔王擾世界英雄萬事期一快不復區區計成敗長星勸汝酒一杯一世之雄曠世才

石川鴻齋英偕僧來謁張副使誤謂爲僧鴻齋作詩自辯余賦此以解嘲

謂僧爲官非禿驚謂官爲僧非沐猴爲官爲僧無不可

呼馬應馬牛應牛先生昨者杖策至兩三老衲共聯袂  
寬衣博袖將毋同只少袈裟念珠耳師丹固非老善忘  
魯侯亦豈儒爲戲知公迹僧心亦僧不復拘拘皮相士  
先生聞當喜欲狂自辯非僧太迂泥但論普度一切心  
安識轉輪三世事吾聞先達曾戲言莫如爲僧樂且便  
世間快意十八九只恨酒色須逃禪入宮有妻案有肉  
棄冠便作飛行仙昨者大邦布令甲宗門無用守戒法  
周妻何肉兩無忌朝過屠門夕擁妾佛如有知亦歡喜  
重願東來度僧牒溯從佛法初來東稻目以後爭信崇  
造經千卷塔七級賜衣百襲粟萬鍾帝王亦稱三寶奴  
上皇尊號多僧徒七道百國輸正稅民膏民血供浮屠  
將軍柄政十數世爭挽強弓不識字斯文一脈比傳燈  
亦賴儒僧延不墜西方菩薩東沙門天上地下我獨尊

尊君爲僧固君福急掩君口聽我言九方何必分黃驢  
兩兔安能辨雄雌鵲飛益記雪泥迹馬耳且任東風吹  
不忍池晚遊詩

上野有不忍池亦名西湖近郊勝地也余每喜晚遊  
長夏暑熱或夜深始歸得詩十數首

開門看雨夢纔醒一抹斜陽映畫屏隨著西風便飛去  
弱花無力繫蜻蜓

蜃樓海氣隱重城浩浩風停遠市聲四壁晚鐘齊接應  
分明不隔一牛鳴

紅板長橋雁柱橫兩頭路接白沙平前呼後擁蕭蕭馬  
猶記將軍警蹕聲

如此江山信可憐驩虞霸政百餘年黃梁飯飽紅燈上  
小戶家家弄管絃

百千萬樹櫻花紅一十二時僧樓鐘白頭烏哭屋梁月

此是侯門彼佛宮

王師東下以上野爲戰場故近處公侯第宅梵王宮殿大半荒廢矣

羯鼓鼙鼙舞折腰銀釭銜壁酒波搖鱸香裊處瓶花側

不掛當時黑鞘刀

東人屋側以隙地爲供鱸插花之所舊時士夫皆佩雙刀宴飲時則懸於

壁今廢此儀矣

薄薄櫻茶一吸餘點心清露挹芙蕖青衣擎出酒波綠

徑尺玻璃紙片魚

鴉背斜陽閃閃紅桃花人面薄紗籠銀鞍并坐妮妮語

馬不嘶風人食風

西人攜眷出遊者每并轡偕行

萬綠沈沈噓一蟬迷茫水氣化湖煙無端吹墜豐湖夢

不到豐湖已十年

絕遠窮荒海外經風災鬼難渡零丁誰知大地山河影

只一微塵水底星

濛濛隔水幾行竹  
暗暗籠煙併是梅  
微影模糊聲擘確  
是誰攜屐踏花來

柳梢斜掛月如丸  
照水搖搖頗耐看  
欲寫眞容無此鏡  
不難捉影捕風難

不耐茫茫對此何  
花如吉野月須磨  
如魚邪虎烏烏武  
樹底時時人唱歌

吉野之櫻須磨之月  
爲東方名勝之最

三更夜深月上櫺  
荷花遙遙透微馨  
鑪烟帖妥窗紗靜  
不解參禪也讀經

山色湖光一例奇  
莫將西子笑東施  
卽今隔海同明月

我亦高吟三笠辭

仲麻呂使於唐將還從明州上舟望  
月作歌世傳爲絕唱三笠山辭是也

官本鳴北以舊題長華園詩索和

繞榭山花紅欲然  
林中結屋屋如船  
人來蓬島無賓主

境比桃源別洞天  
近事披圖談鬥虎

謂英俄二國  
因突厥事

舊游

濡筆紀飛鳶

曾使高麗

登樓北望方多事未許偷閒作散仙

櫻花歌

鶻金寶鞍裝盤陀螺鈿漆盒攜叵羅織張胡蝶衣哆囉  
此呼奧姑彼檀那一花一樹來婆娑坐者行者口吟哦  
攀者折者手揆莎來者去者肩相摩墨江潑綠水微波  
萬花掩映江之沱傾城看花奈花何人人同唱櫻花歌  
道旁老人三嗟咨菊花雖好不如葵卽今遊客多於鯽  
未及將軍全盛時將軍主政國尙武源蹶平顛紛鬥虎  
德川累世柔服人漸變戰場成樂土將軍好花兼好遊  
每歲看花載簫鼓三百諸侯各質孥爭費黃金教歌舞  
千金萬金營香巢花光照海影如潮遊俠聚作萃淵藪  
眞仙亦迷脂夜妖合歌萬葉寫白紵纏頭每樹懸紅綃  
七月張燈九月舞一年最好推花朝噴雲吹霧花無數

一條錦繡遊人路明明樓閣倚空虛玲瓏忽見花千樹  
花開別縣移花來花落千丁載花去十日之遊舉國狂  
歲歲驩虞朝復暮承平以來二百年不聞鼙鼓聞管絃  
呼作花王齊下拜自誇神國尊如天當時海外波濤湧  
龍鬼佛天都震恐歐西諸大日逞強漸剪黑奴及黃種  
芙蓉毒霧海漫漫我自閉關眠不動一朝輪舶礮聲來  
驚破看花衆人夢我聞桃花源洞口雲迷離人間漢魏  
了不知又聞淨土落花深四寸每讀華嚴經卷神爲癡  
拈花再拜開耶姬上告豐葦原國天尊人皇百神祇仍  
願丸泥封關再閉一千載天雨新好花長是看花時

陸軍官學校開校禮成賦呈有栖川熾仁親王

爲將不知兵是謂卒予敵不教驅之戰豈能出以律桓  
文節制師蘇張縱橫策制勝非有他所貴在練習日本



二千年本以武立國幕府值季世犬戎迭相逼賢豪爭  
勤王蔚成中興辟環顧五部洲滄海不可隔函關一丸  
泥勢難復閉壁勇夫且重閉豈曰偃兵革天孫茅纏稍  
高麗鍊鑄的古豈無利器今合借他石近年歐羅巴兵  
法蓋無匹廣輪四海圖上下千年籍擇長以爲師悉命  
譯人譯廣廈千萬間多士宅爾宅羣萃而州處乃受觀  
摩益使指固藉臂伏足固藉翼得一良將才勝百連城  
壁是日營門開軍容荼火赫賢王代臨雍客卿成就席  
組練簡一千距躍習三百拐馬熟連環飛礮鳴霹靂亦  
有輕氣球凌風騰千尺隼人與相撲餘技及刺擊粲粲  
西人服竦立咸屏息王告汝多士勗哉宜勉力刃當摩  
厲須錐乃脫穎出千日可不用兢惕在朝夕王告汝多  
士豺虎在有北養汝民脂膏爲民出鋒鏑汝能扞城民

俾汝公侯伯多士曰唯唯拜手受詔勅使者覩茲禮懽  
忻目屢拭念余捧載書相見藉玉帛同在亞細亞自昔  
鄰封輯譬若輔車依譬若犄角立所恃各富強乃能相  
輔弼同類爭奮興外侮自潛匿解甲歌太平傳之千萬  
億

### 都踊歌

西京舊俗七月十五至晦日每夜互索街上懸燈數  
百兒女艷妝靚服爲隊舞蹈達旦名曰都踊所唱皆  
男女猥褻之詞有歌以爲之節者謂之音頭譯而錄  
之其風俗猶之唐人合生歌其音節則漢人董逃行  
也

長袖飄飄兮髻峨峨荷荷裙緊束兮帶斜拖荷荷分行  
逐隊兮舞傚傚荷荷往復還兮如擲梭荷荷回黃轉綠

兮按莎荷荷中有人兮通微波荷荷貽我釵鸞兮餽我  
翠螺荷荷呼我娃娃兮我哥哥荷荷柳梢月兮鏡新磨  
荷荷雞眠貓睡兮犬不呵荷荷待來不來兮歡奈何荷  
荷一繩隔兮阻銀河荷荷雙燈照兮暈紅渦荷荷千人  
萬人兮妾心無他荷荷君不知兮棄則那荷荷今日夫  
婦兮他日公婆荷荷百千萬億化身菩薩兮受此花荷  
荷三千三百三十二座大神兮聽我歌荷荷天長地久  
兮無差訛荷荷

庚辰四月重野成齋安繹岩谷六一脩日下部東作鳴

鶴蒲生綱齋重章岡鹿門千仞諸君子約遊後樂園  
園卽源光國舊藩邸感而賦此

泓崢蕭瑟不可言周遭水木園亭軒夏初若有新秋意  
褰裳來游後樂園主人者誰源黃門脫棄簪紱甘邱樊

夷齊西山不可得

園有夷齊廟

欲以此地爲桃源左挈舜水

右淡泊想見往往傾空尊嗚呼源平霸者起太阿倒持  
歸將軍黃門懿親敢異議聊借薜薇懷天恩一編帝紀  
光日月開館彰考非爲文高山九郎好痛哭相繼呼天  
叩帝閭布衣文學二三子協力卒使天皇尊卽今賓客  
紛裙屐一堂笑語言溫溫豈識當時圖後樂酒觴未舉  
淚有痕豐碑巍然顏祠倒夕陽歸鴉噪黃昏願起朱子  
使執筆重紀竹帛貽子孫

送宋戶

璣公使之燕京

海外大荒經旣稱帶方東是有君子國挂劍知儒風唐  
宋時遣使車書萬里同縑流唱金經武士橫瑀弓內國  
旣多事外使不復通邇者海禁開乘時多英雄捧盤從  
載書隔海飛艤幢益知唇齒交道誼在和衷子今持使

節累葉家聲隆博學等黃備抱德追管公冠垂華藹枝

手燃梅花紅

世所傳管原道真奉使大唐圖手持梅花二枝考日本史道真雖奉使命實未來華

同行二三子亦如貫珠驥子能彌闕失竹帛銘汝功今日送子去東西倏轉蓬扶桑遙迴顧旭影多朦朧仰瞻闕庭高我心亦忡忡

大阪

黑面猴王今已矣尙餘石壘疊城濠江山入眼光媚樓閣凌虛海氣豪橫列東西青雀舫旁通三百赤欄橋昨宵茗宴今花會多少都人載酒邀

游箱根

危塗遠盤紆徑仄鳥迹絕一步不敢前雙足若被別人呼兜籠來縱橫寬尺八腳手垂郎當腰背盤曲折輿人出裸國皮縐龜兆裂螭蛟繡滿身橫胸施絳袂兩肩乍

擡舉雙杖互扶挈前枝後更撐仰攀俯若跌有如蟻旋  
磨又似蛇出穴踈踈上竹鮎蠹蠹爬沙鼉噫風竹筒吹  
汗雨蒸甑泄勞倦時一歌鄉音鳥嘲哢烟樹繞千迴風  
花眩一瞥峭壁俯絕壑旁睨每橋舌四山呼無人一墮  
便永訣畏途寧中止弛擔婁更迭直窮絕頂高始覺天  
地闊

羣峯插雲中結屋峯頭住濛濛萬雲海憑空無寸土開  
窗起看雲迷茫若無覩一雲忽飛來一雲不肯去一雲  
幻作龍盤旋繞屋柱關窗急遮攔攢隙細如縷須臾塞  
破屋真氣滿庭戶解裝張行囊呼童共撈取大風捲地  
來團作黑煙聚隱隱聞雷聲乍似嬰兒怒遙知百萬家  
已灑三尺雨我方跂腳眠夢騎赤龍舞直傾天河水遠  
向井豫注側身起西望夢墮雲深處

時山西河  
南大旱

舉國無名川一湖何滉漾環抱三百里下窺五十丈神  
武開闢來亘古無消長汎泉日穴出汎流失歸向一碧  
湛空明萬象絕依傍昂頭只日月兩輪互摩盪我來駕  
一舟杳茫迷所往謂是滄溟遊乘風破巨浪何圖衆山  
頂乃泛海蕩蕩關東昔豪傑割地爭霸王湯池據此險  
漆城莫敢上邇來司農官又作填海想鑿脈乾此湖可  
得千沃壤紛紛校得失堯桀我俱忘且作煙波徒容與  
打雙槳

羣山若堂防依巖各構屋家家爭調水曲筧引修竹冷  
泠滴簷角汨汨出巖腹曉鴉猶未興既有游人浴東屋  
鳴琴絃西屋門棋局南屋垂釣竿北屋羅簡牘蛟毫展  
涼簟鶴氅披輕服點白茶始嘗堆紅果初熟蕃舶從海  
來蒲萄泛新淥洪崖揖浮邱簫史媚弄玉雞犬亦飛昇

熊魚各得欲人生貴行樂矧此神仙福纏腰更騎鶴辟俗還食肉平生煙霞心奈此桑下宿行攜桃源圖歸我箕簞谷

宮本鳴北索題晃山圖卽用卷中小野湖山詩韻

地球渾渾周八極大塊鬱積多名山汪洋巨海不知幾萬里乃有此島蝨其間關東八州特秀出落落晃山天半懸亂峯插雲俯水立怒濤潑地轟雷闐坐令三百諸侯竭土木腴民膏血供雲煙下有黑獅白虎蹠蹠蹠蹠伏闕下上有瓊樓玉宇高處天風寒中間一人冕旒擬王者今古護衛僧官千嗚呼將軍主政七百載唯汝勳業差可觀卽今霸圖寥落披此卷尙足令我開笑顏古稱海上蓬萊方壺圓嶠可望不可卽我曰其然豈其然送秋月古香種樹歸隱日向故封卽用其留別詩韻



昨日公侯今老農飄然掛冠歸舊封忙時蠟屐閒扶筇  
空山猿鶴長相從觚棱帝闕春夢濃醒來忽隔天九重  
天風吹袂雲盪胸云胡不樂心溶溶人生一別難相逢  
落月屋梁思子容他時子倘思吾儂雞鳴西望羅浮峯  
近世愛國志士歌

日本自將軍主政凡五百年世不知有王德川氏興  
投戈講藝親藩源光國作大日本史立將軍傳略仿  
世家載記及藩鎮列傳之例世始知尊王之義後源  
松苗作日本史略賴襄作日本外史益主張其說及  
西人劫盟幕府主和諸藩主戰於是議尊王議攘夷  
議尊王以攘夷繼知夷之不可攘復變而講和戎之  
利而大藩聯衡幕府傾覆尊王之事大定矣當家康  
初政頗欲與外國通商繼而天草教徒作亂遂一意

鎖港杜絕內外下令逐教士礮擊外船甚至漂風難  
民亦不許回國處以嚴刑讖者深憂之而未敢昌言  
也外舶紛擾屢戰屢蹶有論防海者有議造礮艦者  
有欲留學外國者德川氏皆嚴禁之唱尊王者觸大  
忌唱通番者犯大禁幕府均下令逮捕黨獄橫興株  
連甚衆而有志之士前仆後起踵趾相接視死如歸  
死於刀鋸死於囹圄死於逃遁死於牽連死於刺殺  
者蓋不可勝數卒以成中興之業維新之功可謂盛  
矣明治初年下詔褒獎各贈階賞卹今舉其尤著者  
十數人著於篇以興起吾黨愛國之士

今日共尊王九原君知否化鶴倘將來摩抄柳莊柳山

昌貞字柳莊甲斐人著柳子十三篇首曰正名謂名不  
正則言不順今以二千餘年之神統三千萬衆之共主  
而屈於一武人名之不正孰甚焉後與竹內武部  
聚徒講武有上告者告其考究江戶險要遂論死

草莽臣正之望闕輒哭謁眼枯淚未枯中有杜鵑血  
正之字仲繩上野人讀史則泣語王室式微則泣訪南  
朝諸將殉難之迹則泣世名之泣瘞每至京師必至二  
條橋遙望闕稽首曰草莽臣正之味死再拜拜畢又泣後西遊久留米自刃於旅寓

怒鞭尊氏像泣述山陵志可憐默默齋猶復不恤緯生蒲  
秀實字君平下野人作山陵志以寓尊王作不恤緯以  
寓懷夷路過東寺見足利尊氏像大聲數其罪鞭之數  
百乃去上書幕府幾陷重法由是乃號默默齋不敢論事矣

拍枕海潮來勿再閉關眠日本橋頭水直接龍動天子林

平仙臺人好遊屢至長崎接西人考外事嘗謂自江戶  
日本橋抵於歐羅巴列國一水相通彼駕巨艦履大海  
如平地視異域如比鄰而我不知備可謂危矣著三國  
兵談及三國通覽二書欲合日本全國為一大城幕府  
命毀其板鋪其藩

文章亦小技能動處士議武門兩石弓不若一丁字梁

緯字星巖美濃人少治陸王之學工詩與賴山陽齊名  
外艦送來歌哭一寓於詩戊午黨獄唱尊王者悉就縛  
幕吏以星巖為其巨魁也數其罪時星巖已臥  
病乃收其妻景婉并下於獄其景婉亦能詩

鎖港百不知惟夢君先覺到今鳩舌聲徧地設音學  
華山二人與高野長英等共譯西書英艦護送漂民歸  
幕府議曰彼以護送為名而陰圖傳教通商意殊巨測  
斷不可以一二細民弛禁華山等腹非之乃作鳩舌小  
記蕃論私記慎機論長英亦著夢物語皆駁攘夷之非  
幕府遂下令  
搜捕嚴錮之

只一衣帶水便隔十重霧能知四國為獨君識時務  
間啓字象山松代入喜讀西書凡統璣及築壘造艦諸  
技皆研究其術嘗創意製迅發銃曰比舊法銃利三倍  
當時薩長肥土諸藩議防海者多師象山云為門人吉  
田松陰畫策航海事發並下獄久之乃釋時水戶藩士  
結黨連名請宣布攘夷詔象山獨主開港將  
上書詣山階親王陳其利害為暴客刺死

丈夫四方志胡乃死檻車倘遂七生願祝君生支那  
矩方字松陰長門人受兵學於佐久間象山每言

今日要務當周航四海庶不致觀人久問象山霧中會幕  
府託和蘭購兵艦象山又曰何給於外墨艦泊浦賀港  
之為愈也幕府不納矩方聞之感憤於時墨艦泊浦賀港

象山實司警衛事乃密謀夜以小舟出港近墨船偽為  
漁人墮水者墨人救之乃固請於小舟將披理求附載披

理奇其才以犯禁故仍送致幕府請勿罪幕府錮之其  
藩密書寄象山曰知時務如先先生今之俊傑也今之諸

入境廬詩草  
卷二  
十一

侯何者可恃神州恢復如何矩方卒被刑維新以來無處  
丈夫死所何處為宜乞告我矩方卒被刑維新以來無處  
門藩士之以尊王立功者多其門人在獄中又  
嘗引楠正成語草七生滅賊說其英烈可想也

甯死不帝秦竟蹈東海死當時互抱人今亦騎箕尾

照西京清寺住持也美艦泊浦賀孝明帝勅令修  
災法賜以御書月照出入公卿門日謀勤王之幕府

尤忌之遂改姓易裴偕西鄉隆盛避難於薩摩聞追捕  
又至又走日泊舟御相抱投海時戊午十一月也同

賞酒酣作歌示隆盛遂相抱投海時戊午十一月也同  
舟平野國臣等爭入海拯之而月照遂死隆盛後立功

為憤憤起三傑與當路不  
協憤憤起三傑與當路不

手寫御屏風美哉猶有憾君看紅旗揚神風掃夷艦

郎一蕙名可為京師人班畫苑寄入美艦之來命其子  
郎一蕙名可為京師人班畫苑寄入美艦之來命其子

作神風覆艦圖以與之嘗寫御屏風後上書論事孝明  
詢其入則畫人也孝明嘆曰屏風所畫皆古來中興事

朕對之實有慚色矣戊午黨獄一蕙父子亦拘繫尋押  
送江戶大學頭池內某與八郎有舊交同在獄中一日

鞠池內意游移及還囚室怒罵之曰汝非人也大丈  
夫寧為溝中瘠鳥可屈節以事權貴哉久乃釋之大丈

雞鳴曉渡關鳥棲夜繫獄長歌招和魂一歌一聲哭

登幾常陸村農黑澤信助之妻也少習國學善和歌戊  
午黨禍興幕府錮水戶藩齊昭或語登幾曰子亦憂國  
之土宜韜晦避禍登幾曰吾雖巾幗當走京師以雪君  
冤乃爲巡詣諸國神佛者已抵京幕吏捕之登幾慨  
然曰妾憂腥膻汚我神州故求之神佛耳豈爲藩主黃  
緣要路哉乃繫之獄後八年朝廷下褒辭曰汝一弱女  
子乃盡力王事始終不變之艱  
險備嘗特賜米十石以養之

宗五汝宗五呼天訴民苦恨不漆頭願留看民歌舞佐

宗五郎不能堪農夫二爲佐倉主堀田某封內民堀田氏  
厚斂民死不能堪農夫二爲佐倉主堀田某封內民堀田氏  
事宜死生以之至江戶訴於堀田氏郎訴於堀田氏  
和州皆不允宗五又曰將軍近堀田氏郎訴於堀田氏  
爲之事終必成及期乃將疏於長竿頭潛匿下谷三  
技橋下將軍乘大輿喝道來宗五躍出投疏衛士縛之  
將軍以責堀田氏堀田氏乃掘田氏家多崇乃爲建祠  
郎及其妻磔死其子斬既而堀田氏家多崇乃爲建祠  
曰山口大明神每歲以二  
月三日八月三日祭之

赤穗四十七義士歌

日本元祿十四年三月天皇勅使聘於將軍將軍命  
內匠頭淺野長矩接伴十四日延使報謝詔命儀未

行長矩卒拔刀擊高家上野介吉良義英義英走仆不死目付官就訊爭故長矩對自奉命接伴上野介每以非禮見遇是以及事將軍大怒命囚長矩責之白卿以憤爭故臨國大禮公然揮刃以私怨滅公法其賜死其弟大學頭長廣收屍葬之泉岳寺報至赤穗長矩老臣大石良雄聚衆言曰上野介尙在吾曹唯有枕城而死耳共刺血盟誓遣使告於長矩外親戶田氏定曰內匠頭有罪伏法臣等謹服命矣惟不共戴天之讎儼然朝列臣等無顏立於人世敢含刃駢死以殉孤城請以此意報之目付官氏定答書曰苟報之目付達於公朝恐將不利於大學頭衆乃更議及收城使至復請曰淺野氏自勝國以來世世蒙國恩今大學頭現在願赦罪繼其家官使曰諾良雄

復語衆曰城亡與亡烏敢以大學故而圖存雖然舍此豈遂無死所哉各位別去明年三月良雄等先後變姓名入江戶佯爲販夫僦居義英第側以伺利便義英畏讎一夕三遷莫測其蹤跡而嘗以茶事爲嬉所喜茶人某每會必與大高忠雄乃佯爲富商從學茶燕法十二月十四夜義英將集飲於家良雄等得茶人誣遂聚衆舉事按第圖定部分衆皆戴鐵兜衷鎗甲外爲救火吏服擔弓鎗長梯大椎從之神崎則休鄉導夜四更至至則搥門緣屋乘高呼曰內匠頭家士爲報讎來敢出拒者斬弱無力者坐不動者置之驢呼入室每室燒燭徧搜不能得乃捕刼一人導至寢所有義英席臥被尙暖衆知其逃匿不遠更四出旁搜間光興至房側聞囁囁有耳語聲破戶呼曰



得無在是耶衆發矢奮鎗薄之房乃藏茶具者有人  
亂擲物以拒武林隆重揭燭見一人著白襯衣在隱  
所方拔刀欲起隆重撓進斫而殪之額及背有創痕  
喜曰此非亡主所手擊者哉乃吹螺嘯聚以竿懸首  
擁往泉岳寺長矩墓所良雄預作具名書二通一留  
義英外廳一遣人齎詣彈正官仙石久尙第自明其  
報仇非抗國法良雄等既至寺以櫟盤盛義英首又  
出七首置碑跼上鋒刃外向四十七士自呼名拜謁  
環跪墓前讀祭文曰去年三月十四日之事臣等卑  
賤疏遠不與知其狀然竊料我公與吉良上野君必  
有積怨深仇非得已也不幸仇人未得而身死國除  
遂以一朝之憤而亡百年之業臣等食君之祿應死  
君之事苟覩顏視息他日蒙恥入地將何面目見我

公乎臣等自謀此事棄妻子捐親戚奔走東西不遑  
寧處凡一年又二百七十日於茲矣常慮蓋先朝露  
所志不遂重爲世笑賴天之明君之靈昨夕四更往  
攻吉良氏臣等幸得藉手以畢先公未了之志此上  
首昔公在時割所愛以賜臣者今謹以奉上請公以  
此甘心仇人以洗宿恨讀畢起取盤上首以上首擊  
之三復相聚大哭旣出見寺僧曰某等之事畢矣仙  
石久尙以事聞將軍命分囚之四諸侯邸明年二月  
四日就所拘之邸令以屠腹死命曰前者淺野內匠  
所犯大不敬論死如法而吉良上野介以無罪原而  
不問生殺皆出上旨汝等乃誣以主讎結徒聚衆執  
持弓矢擅殺朝臣大逆不道其賜自盡衆皆稽首曰  
自分應處極刑乃賜劍自裁此朝廷之仁也某等死

瞑目矣乃悉葬之長矩墓側各爲立碑府下弔祭者  
填湊成市數月不已咸稱爲四十七義士各搜輯其  
姓氏年甲遺事刊錄成帙所遺手澤爭寶藏焉

四十七士人同仇四十七士心同謀一盤中供仇人頭  
哀哀燕雀鳴啁啾泥首泣訴圍松楸臣等無狀恐爲當  
世羞君雖有臣不能爲君持干楸君實有弟不獲傳國  
如金甌君亦有國民不敢興師修戈矛猶復覲顏視息  
日日偷臣等非敢國法讎伏念國亡君死實惟仇人由  
當時天使來奉命同會酬環門觀禮千人稠彼名高家  
實下流高家世以知禮名  
接伴官每事問之罵我衣冠如沐猴笑我朝會  
啼禿驚我君怒如鯁在喉拔劍一發不復收烏知仇人  
不死翻貽家國憂臣等聞變行嘆復坐愁或言死拒或  
言死請無能運一籌同官臭味殊薰蕕一國蒙戎如狐

裘最後決意報讎同力勦灑血書誓無悔尤四十七人  
相綢繆蹈間伺隙忽忽歲一周昨夜四更月黑至鵠鵲  
衆皆衷甲撐鐵兜長梯大推兼利鏃或踰高墉或踰溝  
開門先刃鈴下騶大呼轉門如貔貅彼仇人者巧藏彊  
如椽銀燭徧宅搜神恫鬼怒人焉度闖然首出霜鋒抽  
彼盤之中血鬪體先公猶識愴父面目不此一匕首先  
公所賜繞指柔請公含笑試吳鉤勿復齎恨埋九幽臣  
等事畢無所求願從先君地下游國家明刑有皋繇定  
知四十七士同作檻車囚不願四十七士戴頭如贅疣  
唯願四十七士駢死同首邱將軍有令付管勾綱輿分  
置四諸侯明年賜劍如杜郵四十七士性命同日休一  
時驚嘆爭歌謳觀者拜者弔者賀者萬花繞塚每日香  
煙浮一裙一屐一甲一胄一刀一矛一杖一笠一歌一

畫手澤珍寶如天球自從天孫開國首重天瓊鉉和魂  
一傳千千秋況復五百年來武門尙武國多賁育儔到  
今赤穗義士某某某四十七人一一名字留內足光  
輝大八州外亦聲明五大洲

罷美國留學生感賦

漢家通西域正值全盛時南至大琉球東至高句驪北  
有同盟國帝號俄羅斯各遣子弟來來拜國子師皇帝  
臨辟雍皇皇漢官儀石經出玉篋寶蓋張丹墀諸王立  
橫巷百蠻環泮池於戲盛德事慨想軒與羲自從木蘭  
狩國弱勢不支環球六七雄鷹立側眼窺應制臺閣體  
和聲帖括詩二三老臣謀知難濟傾危欲爲樹人計所  
當師四夷奏遣留學生有詔命所司第一選雋秀其次  
擇門楣高門掇科第若摘領下髭黃背好八股肯令手

停披茫茫西半球遠隔天之涯千金不垂堂誰敢狎蛟  
螭惟有小家子重利輕別離紇千山頭雀短喙日啼饑  
但圖飛去樂不復問所之藍縷田舍奴蓬頭乳臭兒優  
給堂食錢榮頒行裝衣舟中東西人相顧驚復疑此乃  
窶人子胡爲來施施使者挈乘槎四牡光駢駢鄭重詔  
監督一一聽指麾廣廈百數間高懸黃龍旗入室闐無  
人但見空皋比便便腹高臥委蛇復委蛇借問諸學生  
了不知東西各隨女師去雛雞母相依鳥語日啾啾庶  
幾無參差就中高材生每有出類奇其餘中不中太半  
悲染絲千花紅氍毹四窗碧琉璃金絡水晶柱銀盤夜  
光杯鄉愚少所見見異輒意移家書說貧窮問子今何  
居我今膳雙雞誰記炊屢屢汝言盎無糧何不食肉糜  
客問故鄉事欲答顏忸怩嬉戲替戾岡游謔賀跋支互

談伊優亞獨歌妃呼稀吳言與越語病忘反不知亦有  
習祆教相率拜天祠口嚼天父餅手繙景教碑樓臺法  
界住香華美人貽此間國極樂樂不故蜀思新來吳監  
督其僚喜官威謂此泛駕馬銜勒乃能騎徵集諸生來  
不拜卽鞭笞弱者呼晷痛強者反唇稽汝輩狼野心不  
如鼠有皮誰甘畜生罵公然老拳揮監督憤上書益以  
加罪辭諸生盡佻達所業徒荒嬉學成供蠻奴否則仍  
漢癡國家糜金錢養此將何爲朝廷命使者去留審所  
宜使者護諸生本意相維持監督意亦悔駟馬舌難追  
使者甫下車含怒故詆謫我不知許事我且食蛤蜊監  
督拂衣起喘如竹筒吹一語不能合遂令天地睽卽當  
一百人一一悉遣歸竟如瓜蔓抄牽累何纍纍當其未  
遣時西人書交馳總統格蘭脫校長某何誰願言華學

生留爲國光輝此來學日淺難言成與虧頗有聰穎士  
利錐非鈍槌忽然筵席徹何異輦帶褫本圖愛相助今  
胡棄如遺相公答書言不過別瑕疵一旦盡遣撤譁然  
稱我欺怒下逐客令旋禁華工來溯自西學行極盛推  
康熙算兼幾何學方集海外醫天士充日官南齋長追  
隨廣譯奇器圖諸器何夥願惜哉國學舍未及設狄鞮  
矧今學興廢尤關國盛衰十年教訓力百年富強基奈  
何聽兒戲所遣皆卑微部婁難爲高混沌強畫眉坐令  
遠大圖壞以意氣私牽牛罰太重亡羊補恐遲蹉跎一  
失足再遣終無期日送海舟返萬感心傷悲按美國留  
學生於辛  
巳年裁撤奏請派往者曾文正公募集學生者豐順丁  
日昌率往者吳川陳蘭彬後派使大臣前監督高州  
區譯良新會容增祥後監督南豐吳嘉善其僚友爲金  
某初率學生繼派副使爲新會容閔哈佛學堂亦其手  
云



徐晉齋觀察壽朋吳翰濤貳尹廣霈隨使美洲道出日

本余飲之金壽樓翰濤卽席有詩和韻以贈

銅琶高唱大江東不許閒愁惱乃公四海霸才能有幾

翰濤贈王毀園詩云落落寶中兩霸才又云縱交深嘆霸才稀今宵歡樂又偕同狂呼

酒盞看樊素醉拭刀鉞辨正宗離別尋常休悵怨男兒

志本在飛蓬

流求歌

白頭老臣倚牆哭顏髻斜簪衣慘綠自嗟流蕩作波臣  
細訴興亡溯天蹴天孫傳世到舜天海上踟躕一脈延  
彈丸雖號蕞爾國問鼎猶傳七百年大明天子雲端裏  
自天草詔飛黃紙印綬遙從赤土頒衣冠幸不珠崖棄  
使星如月照九州王號中王國小球英蕩雙持龍虎節  
繡衣直指鳳麟洲從此苞茅勤入貢豔說扶桑爾如甕

酋豪入學還請經天王賜襲仍歸贈爾時國勢正稱強  
日本猶封異姓王只戴上枝歸一日更無尺詔問東皇  
黑面小猴投袂起謂是區區應余界數典橫徵貢百牢  
兼弱忽然加一矢鯨鯢橫肆氣吞舟早見降幡出石頭  
大夫拔舍君含壁昨日蠻王今楚囚畏首畏尾身有幾  
籠鳥惟求寬一死但乞頭顱萬里歸妄將口血羣臣誓  
歸來割地獻商於索米仍輸歲歲租歸化雖編歸漢里  
畏威終奉嚇蠻書一國從茲臣二主兩姑未覺難爲婦  
稱臣稱姪日爲兄依漢依天使如父一日維新時事異  
二百餘藩齊改制覆巢豈有完卵心顧器略存投鼠忌  
公堂纔錫藩臣宴鋒車竟走降王傳剛聞守約比交隣  
忽爾廢藩夷九縣吁嗟君長檻車去舉族北轅誰控訴  
鬼界明知不若人虎性而今化爲鼠御溝一帶水溶溶

流水花枝胡蝶紅尙有丹書珠殿挂空將金印紫泥封  
迎恩亭下蕉陰覆相逢野老吞聲哭旌麾莫覩漢官儀  
簪纓未改秦衣服東川西川弔杜鵑稠父宋父泣鸛鵒  
興滅曾無翼九宗賜姓空存殷七族幾人脫險作逋逃  
幾次流離呼伯叔北辰太遠天不聞東海雖枯國難復  
氈裘大長來調處空言無施究何補只有琉球卹難民  
年年上疏勞疆臣

人境廬詩草卷二終

民國十九年六月  
長孫能立重校印

入境廬詩草卷四

嘉應黃遵憲公度

奉命爲美國三富蘭西士果總領事留別日本諸君子

遠泛銀河附使舟眼看滄海正橫流欲行六國連衡策  
來作三山汗漫遊唐宋以前原舊好弟兄之政况同仇  
如何甌脫區區地竟有違言爲小球

占此江山亦足豪凌虛樓閣五雲高人饒春氣花多媚  
山入波流地尙牢六代風流餘蠟屐百家磨鍊惜名刀  
廿年多少滄桑感盡日憑欄首重搔

海外偏留文字緣新詩脫口每爭傳草完明治維新史  
吟到中華以外天王母環來誇盛典吾妻鏡在訪遺編  
若圖歲歲西湖集四壁花容百散仙

海水南旋連粵嶠斗星北望指京華但煩青鳥常通訊  
貪住蓬萊忘憶家一日得閒便山水十分難別是櫻花  
白銀宮闕吾曾至歸與鄉人信口誇

滄溟此去浩無垠回首江城意更親昔日同舟多敵國  
而今四海總比鄰更行二萬三千里等是東西南北人  
獨有興亞一腔血爲君戶戶染紅輪

爲佐野雪津常民題觚亭

占得江山美觚亭足勝遊高人欣對宇老子許登樓海  
氣龍頭日天風鵬背秋他時回首望認此作并州

海行雜感

正月十八日由橫濱展輪往美利堅二月十二日到  
舟中無事拉雜成此

東流西日奈愁何蕩以天風浩浩歌九點煙微三島小

人間世要縱婆娑

稗瀛大海善談天  
艸女童男遠學仙  
倘遂乘桴更東去  
地球早闢二千年

疊牀恰受兩三人  
奩鏡盂巾位置勻  
寸地尺天雖局蹐  
儘容稊米一微身

青李黃甘爛熳堆  
蒲桃濃綠潑新醅  
怪他一白清如許  
水亦輪迴變化來

食果皆購自歐美二洲諸錫罐封固出之若新摘者水皆用蒸氣一經變

化無復海鹹矣

中年歲月苦風飄  
強半光陰客裏拋  
今日破愁編日記  
一年卻得兩花朝

船迎日東行見日遽速於半途必加一日方能合歷此次重日仍作爲

二月初二故云

打窗壓屋雨風聲  
起看滄波一掌平  
我自冒風衝雨過  
原來風雨不會晴

星星世界徧諸天不計三千與大千倘亦乘槎中有客  
回頭望我地球圓

每每鴛鴦逐隊行春風相對坐調箏纔聞兒女呢呢語

又作胡雛戀母聲

同舟西人多攜卷屬有俄羅斯公使夫婦每夕對坐彈琴和歌其聲動心

偶然合眼便家鄉夜二三更母在牀促織入門蛛掛壁  
一燈絮絮話家常

是耶非耶其夢耶風乘我我乘風耶藤牀簾魂睡新覺  
此身飄飄天之涯

一日明明十二時中分大半睡迷離黃公卻要攜黃嬾

遮眼文書一卷詩

余居東時曾戲刊一印曰東海黃公

家書瑣屑寫從頭身在茫茫一葉舟紙尾只填某日發  
計程難說到何州

拍拍羣鷗逐我飛不會相識各天涯欲憑鳥語時通訊

又恐華言汝未知

蓋海旌旗闢道開巨輪壁浪礮鳴雷西人柄酌東人酒  
長記通盟第一回日本與泰西立約實自嘉永癸丑美將披理以兵劫盟始所率軍艦七艘  
由太平洋東來同舟日本人有讀披理盟紀行者將到時猶能指其出師處也

逐客篇

華人往美利堅始於道咸間初由招工踵往者多數  
至二十萬衆土人以爭食故譁然議逐之光緒六年  
合衆國乃遣使三人來商訂限制華工之約約成至  
八年三月議院遂藉約設例禁止華工感而賦此

嗚呼民何辜值此國運剝軒頊五千年到今種極弱鬼  
蜮實難測魑魅乃不若豈謂人非人竟作異類虐茫茫  
六合內何處足可託華人渡海初無異鑿空鑿團焦始  
蝸廬周防漸虎落藍縷啓山林邱墟變城郭金山蟹塚



高伸手左右攫驩呼滿載歸羣誇國極樂招邀盡室行  
後腳踵前腳短衣結椎髻擔簦躡草屨酒人率庖人執  
鉞偕執斲抵掌齊入秦諸毛紛繞豚後有紅巾賊刊章  
指名捉逋逃萃淵藪趨如蛇赴壑同室戈婁操入市刃  
相斲助以國網寬日長土風惡漸漸生妬爭時時縱謠  
詠謂彼外來丐只圖飽囊橐地皮足一踏有金盡跳躍  
腰纏得萬貫便騎歸去鶴誰肯解髮辮爲我供客作或  
言彼無賴初來盡袒膊喜如蟲撲緣怒則獸噬搏野蠻  
性嗜殺無端血染鍔此地非惡溪豈容食人鱷又言諸  
婁羅生性極齷齪居同狗國穢食等豕牢薄所需日百  
錢大穀難比較任彼賤值傭我輩坐股削眼見手足傷  
誰能忍毒蘊千口音譊譊萬目瞪灼灼聯名十上書上  
請王斟酌驟下逐客令此事恐信約萬國互通商將以

何辭卻姑遣三人行藉免衆口鑠擲梟倘成盧聊一試  
蒲薄誰知糊塗相公然閉眼喏噫嘻六州鐵誰實鑄大  
錯從此懸厲禁多方設局鑰丸泥便封關重門復擊柝  
去者鵲遶樹居者燕巢幕關譏到過客郊移及游學國  
典與隣交一切束高閣東望海漫漫絕遠踰大漠舟人  
呼叩須津吏唱公莫不持入關繻一來便受縛但是黃  
面人無罪亦筭掠慨想華盛頓頗具霸王略檄告美利  
堅廣土在西漠九夷及八蠻一任通邛笮貢白紅黑種  
一律等土著逮今不百年食言曾不忤吁嗟五大洲種  
族紛各各攘外斥夷戎交惡詈島索今非大同世祇挾  
智勇角芒碭紅番地知汝重開拓飛鷹倚天立半球悉  
在握華人雖後至豈不容一勺有國不養民譬爲叢毆  
爵四裔投不受流散更安着天地忽跼蹐人鬼共咀嚼

皇華與大漢第供異族謔不如黑奴蠢隨處安渾噩堂  
堂龍節來叩關亦足矍倒傾四海水此恥難洗濯他邦  
互效尤無地容飄泊遠步想章亥近功陋衛霍芒芒問  
禹跡何時版圖廓

### 紀事

甲申十月爲公舉總統之期合衆黨欲留前任布連  
而共和黨則舉姬利扶蘭兩黨開爭卒舉姬君詩以  
紀之

吹我合衆笳擊我合衆鼓擊我合衆花書我合衆簿汝  
衆勿喧譁請聽吾黨語人各有齒牙人各有肺腑聚衆  
成國家一身比尺土所舉勿參差此乃衆人父擊我共  
和鼓吹我共和笳書我共和簿擊我共和花請聽吾黨  
語汝衆勿喧譁人各有肺腑人各有齒牙一身比尺土

聚衆成國家此乃衆人父所舉勿參差

此黨誇彼黨看我後來績通商與惠工首行保護策黃金准銀價務令昭畫一家家田舍翁定多十斛麥凡我美利堅不許人侵軼遠方黃種人閉關嚴逐客毋許溷乃公鼾睡臥榻側譬如耶穌餅千人得飽食太阿一到手其効可計日彼黨斥此黨空言彼何益

彼黨訐此黨黨魁乃下流少作無賴賊曾聞盜人牛又聞挾某妓好作狹邪遊聚賭葉子戲巧術妙竊鉤面目如鬼蜮衣冠如沐猴隱隱數不盡汝衆能知不是誰承餘竅竟欲糞佛頭顏甲十重鐵亦恐難遮羞此黨訐彼黨衆口同一咻

某日戲馬臺廣場千人設縱橫烏皮几上下若梯級華燈千萬枝光照繡帷撤登場一酒胡運轉廣長舌盤盤

黃鬚虬閃閃碧眼鵲開口如懸河滾滾浪不竭笑激屋  
瓦飛怒轟庭柱裂有時應者者有時呼咄咄掌心發雷  
聲拍拍齊擊節最後手高舉明示黨議決

演說事未已復闢縱觀場鐵兜繡緇褶左右各分行寶  
象黃金絡白馬紫絲纒橐橐安步靴林林聳肩鎗或帶  
假面具或手執長槍金日戲方相黑臉畫鬼王仿古十  
字軍赤旆風飄揚齊唱愛國歌曼聲音繞梁千頭萬頭  
動競進如排牆指點道旁人請觀吾黨光

衆人耳目外重以甘言誘濃綠茁芽茶淺碧釀花酒斜  
紋黑普羅雜俎紅氍毹瑣屑到釵釧取足供媚婦上謁  
士雕龍下訪市屠狗墨屎與侏張相見輒握手指此區  
區物是某託轉授懷中花名冊出請紀誰某知君有烟  
族知君有甥舅賴君提挈力吾黨定舉首丁甯復丁甯

幸勿雜然否

四年一公舉今日眞及期兩黨黨魁名先刻黨人碑人  
人手一紙某官某何誰破曉車馬聲萬蹄紛奔馳環人  
各帶刀故示官威儀實則防民口預備國安危路旁局  
外人各各捩眼窺三五立街頭徐徐捥領髭大邦數十  
籌勝負終難知赤輪日可中已詫郵遞遲俄頃一報來  
急喘竹筒吹未幾復一報聞鑼驚復疑抑揚到九天啼  
笑奔千兒夜半籌馬定明明無差池轟轟祝礮聲雷響  
雲下垂巍巍九層樓高懸總統旗

吁嗟華盛頓及今百年矣自樹獨立旗不復受壓制紅  
黃黑白種一律平等視人人得自由萬物咸遂利民智  
益發揚國富乃倍蓰泱泱大國風聞樂嘆觀止烏知舉  
總統所見乃怪事怒揮同室戈憤爭傳國璽大則釀禍

亂小亦成擊刺尋常瓜蔓抄逮捕徧官吏至公反成私  
大利亦生弊究竟所舉賢無愧大寶位倘能無黨爭尙  
想太平世

馮將軍歌

馮將軍英名天下聞將軍少小能殺賊一出旌旗雲變  
色江南十載戰功高黃絳色映花翎飄中原蕩清更無  
事每日摩挲腰下刀何物島夷橫割地更索黃金要歲  
幣北門管鑰賴將軍虎節重臣親拜疏將軍劍光方出  
匣將軍謗書忽盈篋將軍鹵莽不好謀小敵雖勇大敵  
怯將軍氣湧高於山看我長驅出玉關平生蓄養敢死  
士不斬樓蘭今不還手執蛇矛長丈八談笑欲吸匈奴  
血左右橫排斷後刀有進無退退則殺奮挺大呼從如  
雲同拚一死隨將軍將軍報國期死君我輩忍孤將軍

恩將軍威嚴若天神將軍有令敢不遵負將軍者誅及  
身將軍一叱人馬驚從而往者五千人五千人衆排牆  
進綿綿延延相擊應轟雷巨礮欲發聲旣戟交胸刀在  
頸敵軍披靡鼓聲死萬頭竄竄紛如蟻十盪十決無當  
前一日橫馳三百里吁嗟乎馬江一敗軍心懾龍州拓  
地賊氛壓閃閃龍旗天上翻道咸以來無此捷得如將  
軍十數人制挺能撻虎狼秦能興滅國柔強鄰嗚呼安  
得如將軍

九姓漁船曲

白石青溪波作鏡翩翩自照驚鵝影本來此事不干卿  
偏擾波瀾生古井使君五馬從天來八閩張羅網賢才  
何圖滿載載珊瑚後還有西施網載回西施一舸輕波軟  
原是官船當娃館玉女清臚隔牖窺徑就郎懷歌婉轉



婉轉偎郎倚郎坐不道魯男真不可此時忍俊未能禁  
此夕銷魂便真箇門前烏柏天將曙牽篷重對雙星訴  
君看銀潢一道斜小星竟向鵲橋渡鵲橋一渡太匆匆  
割臂盟寒忍負儂不願郵亭纔一夕寧將歌曲換三公  
紛紛禮法言如雨風語華言相註誤欲乞春陰巧護花  
綠章寧向東皇訴略言臣到庚宗宿大隄花豔驚人目  
爲求筵室夢泉邱敢挈阿嬌貯金屋彈章自劾滿朝驚  
竟以風流微罪行如何鐵石心腸者偏對梨渦忽有情  
雅娘傳語鴆媒妬儂家世世橫塘住相當應嫁弄潮兒  
不然便逐浮梁賈張羅得鳥雖有緣將珠抵鵲寧非誤  
禍水真成薄命人微瑕究惜閒情賦剛說高飛變鳳凰  
無端打散驚鴛鴦金釵敲斷都由我團扇遮羞怕見郎  
永豐坊柳絲絲綠拋卻一官牘雙宿莫將破甑屢迴頭

且唱同舟定情曲

感懷

下阻黃壚上九天白雲望斷眼空懸濛濛零雨又寒食  
浩浩長流總逝川萬里游惟圖一飽三年淚忍到重泉  
此身俯仰都慚愧鞅掌猶言我獨賢

入境廬詩草卷四終

民國十九年六月  
長孫能立重校印

入境廬詩草卷五

嘉應黃遵憲公度

八月十五夜太平洋舟中望月作歌

茫茫東海波連天天邊大月光團圓  
送人夜夜照船尾今夕倍放清光妍  
一舟而外無寸地上者青天下黑水  
登程見月四回明歸舟已歷三千里  
大千世界共此月世人不共中秋節  
泰西紀歷二千年只作尋常數圓缺  
舟師捧盤登舵樓船與天漢同西流  
虬髯高歌碧眼醉異方樂祇增人愁  
此外同舟下牀客夢中暫免供人役  
沈沈千蟻趨黑甜交臂橫肱睡狼藉  
魚龍悄悄夜三更波平如鏡風無聲  
一輪懸空一輪轉徘徊獨作巡檐行  
我隨船去月隨身月不離我情倍親  
汪洋東海不知幾萬里今夕之夕惟  
我與爾對影成三人舉頭西指雲深

處下有人家億萬戶幾家兒女怨別離幾處樓臺作歌舞悲歡離合雖不同四億萬衆同秋中豈知赤縣神州地美洲以西日本東獨有一客敬孤篷此客出門今十載月光漸照鬢毛改觀日會到三神山乘風竟渡太瀛海舉頭只見故鄉月月不同時地各別卽今吾家隔海遙相望彼乍東升此西沒嗟我身世猶轉蓬縱游所至如鑿空禹跡不到夏時變我游所歷殊未窮九州腳底大球背天胡置我於此中異時汗漫安所抵搔頭我欲問蒼穹倚欄不寐心憧憧月影漸變朝霞紅朦朧曉日生於東

歸過日本誌感

舊游重到一凄然電掣光陰又四年老輩漸聞歌薤露滄波眞易變桑田出關符傳行人璽橫海旌旗下瀨船

今日荷戈邊塞去可堪雪窖復冰天

謂何子義大使

### 舟中驟雨

極天唯海水水際忽雲橫雲氣隨風走風聲挾雨行鵬垂天欲墮龍吼海齊鳴忽出風圍外滄波萬里平

### 到香港

水是堯時日夏時衣冠又是漢官儀登樓四望眞吾土不見黃龍上大旗

### 到廣州

秋風獨上越王臺弔古傷今幾霸才表裏山河故無恙

因越南事近始解嚴

逍遙天海此歸來滄波淼淼八千里圓月匆

匆一百回自撫頭顱看髀肉側身東望重徘徊

### 肇慶舟中

穩臥孤篷底迷茫夜氣微使星正西向零雨悵東歸燈

影侵孤枕波聲蕩四圍行藏無一是萬事付沾衣

將至梧州誌痛

灑盡燈前淚偏沾身上衣呼天惟負負戀母尚依依吹  
樹風何急尋巢鳥獨飛殷勤看行篋在日寄當歸

游七星巖

歸帆正藉好風吹卻爲看山誤我期急水漸趨江合處  
奇峯橫出路窮時欲尋柯斧仙何處

肇慶有爛柯山云  
卽王質觀棋之處

久困津梁佛亦疲返景入林人坐久昏鴉何事獨歸遲  
夜宿潮州城下

九曲潮江水遙通海外天客程餘百一江路故迴旋犬  
亦鄉音吠鷗依岸影眠鴈聲催款乃既有曉行船

夜泊

一行歸雁影零丁相倚雙鳬睡未醒人語沈沈篷悄悄

沙光淡淡竹冥冥近家鄉夢心尤亟拍枕濤聲耳厭聽  
急趁天明催艣發開門斜月帶殘星

遠歸

人人相見各開顏載得春風入玉關鄰里關心問筐篋  
兒童拍手唱刀環且圖傍岸牽舟住競說乘槎犯斗還  
海外名山都看遍杖藜還看故鄉山

鄉人以余遠歸爭來詢問賦此誌感

歡迎海客遠游歸各認容顏半是非六合外從何處說  
十年來漸故人稀糟牀爭送牆頭酒針線愁牽身上衣  
舊識新交徧天下可如親戚話依依

今夕

相逢都怪鬢毛蒼今夕重依燈燭光已去年華一彈指  
無窮心事九迴腸雲中蜃氣樓臺幻海外龍堆道路長



身世茫茫何可說呼兒炊飯熟黃梁

春夜招鄉人飲

春風漾微和吹斷簷前雪寒犬吠始停衆客互排闥出  
甕酒子醖欹壁燭奴熱花豬間黃雞亦足供鋪醢團坐  
盡鄉鄰無復苛禮設以我久客歸羣起爭辯詰初言曰  
本國舊是神仙窟珊瑚交枝柯金銀眩宮闕雲餘白傅  
龕錦留太眞鞵今猶驂鸞來眼見非恍惚子乘仙槎去  
應識長生訣靈芝不死藥多少祕筐篋或言可倫坡索  
地始未獲匝月糧懼罄磨刀咸欲殺天神忽下降指引  
示玉牒巨鼉戴山來再拜請手接狂呼登陸去礮響轟  
空發人馬合一身手秉黃金鉞野人走且僵驚辟鬼羅  
刹卽今牛貨洲利盡西人奪金穴百丈深求取用不竭  
又言太平洋地當西南缺下有海王宮蛟螭恣出沒漫

空白雨跳往往魚吐沫曾有千斛舟隨波入長舌天地  
黑如盤腥風吹雨血轉腸入輪迴遺矢幸出穴始知出  
魚腹人人慶復活傳聞浮海舟盡裹十重錢疊牀十八  
層上下各區別牛羊豕雞狗萬物萃一筏康莊九達開  
周廬千戶闢船頭速船尾巡行認車轍其人好樓居四  
窗而入達千光壁琉璃五色紅靺鞨傑閣高入雲明明  
月可掇出入鬼仙間多具鎖子骨曾見高緹枝行繩若  
飛越犁韃善眩人變態尤詭譎常聞海客談異說十七  
入太章實親見然否待子決諸胡飽腥羶四族出饕餮  
飢盤比塔高硬餅藉刀截菜香苜蓿肥酒豔葡萄潑冷  
淘黏山蠓濃汁爬沙鼈動指思異味諒子固不屑古稱  
美鬚眉今亦誇白皙紫髯盤蟠虬碧眼閃健鶻子年未  
四十鬚鬢須在頰諸毛紛繞豚東塗復西抹得毋逐臭

夫習染求容悅子如誇狄強應舉巨觥罰謬稱夜郎大  
能步禹跡闊試披地球圖萬國僅蟻蝨豈非談天衍妄  
論工剽竊一唱十隨和此默彼又聒醉喝杯箸翻笑震  
屋瓦裂平生意氣頗滔滔論不歇到此窮詰屈口籍舌  
反結自作滄溟游積日多於髮所見了無奇無異在眉  
睫山經伯翳知坤圖懷仁說足迹未徧歷安敢遽排訐  
大鵬恣扶搖暫作六月息尙擬汗漫游一將耳目豁再  
閱十年歸一一詳論列

小女

一燈團坐話依依簾幕深藏未掩扉小女挽鬚爭問事  
阿娘不語又牽衣日光定是舉頭近海大何如雨手圍  
欲展地球圖指看夜燈風幔落伊威

卽事

牆外輕陰淡淡遮牀頭有酒巷無車將離復合風吹絮  
乍暖還寒春養花一醉夢騰如夢裏此身飄泊又天涯  
打窗山雨琅琅響猶似波濤海上槎

下水船歌

電光一掣光閃天洪波直瀉無迴旋  
餓鷹脫鞴兔走穴馳輪下阪箭離弦  
君看我舟疾如駛世間快事那有此  
潮頭拍拍鷗亂飛舟人叫絕篙師喜  
一山當頭一對面倏忽兩山都不見  
羣山轉瞬眼欲花况又山頭雲萬變  
江隨山轉氣益驕蹴沙嚙石波橫跳  
山雖百折舟一直拍耳惟覺風刁刁  
風聲水聲相鼓盪舷傾桅側終無恙  
風乘我耶我乘風便凌霄漢游天上  
年來足跡徧五洲浮槎曾到天盡頭  
長風波浪奚足道平生奇絕輸此游  
忽聞隔岸唱邪許繹夫努力力如虎  
百丈橫牽上瀨舟

三朝三暮見黃牛

閉關

鬱鬱松陰外深深一閉關暫游二萬里小住兩三間雲  
懶隨龍臥風微任鳥還牆頭山自好何必詗神山  
春暮偶游歸飲人境廬

某水某山我故鄉今時今日好容光頻年花事春三月  
獨我蓬飄天一方門外驪駒猶在道堂前燕子穩棲梁  
金盆月豔葡萄綠便擬狂飛千百觴

拜曾祖母李太夫人墓

鬱鬱山上松呀呀林中鳥松有蔭孫枝鳥非反哺雛我  
生墮地時太婆七十五明年阿弟生弟兄日爭乳太婆  
向母懷伸手抱兒去從此不離開一日百摩撫親手裁  
綾羅爲兒製衣裳糖霜和麪雪爲兒作餵餵髮亂爲梳

頭脚膩爲煖湯東市買脂粉磧面日生香頭上盤雲髻  
耳後明月璫紅裙絳羅襦事事女兒妝牙牙初學語教  
誦月光光一讀一背誦清如新炙簧三歲甫學步送兒  
上學堂知兒故畏怯戒師莫嚴莊將出牽衣送未歸踣  
閭望問訊日百回赤足足奔忙春秋多佳日親戚盡團  
聚雙手擎掌珠百口百稱譽我家七十人諸子愛渠祖  
諸婦愛渠娘諸孫愛渠父因裙便惜帶將嫌難比素老  
人性偏愛不顧人笑侮鄰里向我笑老人愛不差果然  
好相貌豔豔如蓮花諸母背我罵健犢行破車上樹不  
停腳偷芋信手爬昨日探鵲巢一跌敗兩牙嚙血噴滿  
壁盤礴畫龍蛇兄妹昵我言向婆乞金錢直傾紫荷囊  
滾地金鈴圓爺娘拊我耳勸婆要加餐金盤膾鯉魚果  
爲兒下咽伯叔牽我手心知不相干故故摩兒頂要圖

老人歡兒年九歲時阿爺報登科劍兒大父旁一語三  
摩挲此兒生屬猴聰明較猴多雛雞比老雞異時知如  
何我病又老耄情知不堅牢風吹兒不長那見兒扶搖  
待兒勝冠時看兒能奪標他年上我墓相攜着宮袍前  
行張羅繖後行鳴鼓簫猪雞與花果一一分肩挑爆竹  
響墓背墓前紙錢燒手捧紫泥封云是夫人誥子孫共  
羅拜焚香向神告兒今幸勝貴頗如母所料世言鬼無  
知我定開口笑大父回顧兒此言兒熟記一年記一年  
兒齒加長矣兒是孩提心那知太婆事但就兒所見依  
稀記一二太婆每出入籠東挂一杖後來杖挂壁時見  
垂帷帳夜夜攜兒眠呼娘搔背蚌展轉千搥腰殷殷春  
雷響佛前燈尙明窗隙見月上大父褰簾來歡笑時鼓  
掌瑣屑及鄉鄰譏訶到官長每將野人語眩作鬼魅狀

太婆悄不謾便知婆欲睡戶樞徐徐關移踵車輪曳明  
朝阿娘來奉匜爲盥洗欲飯爺捧盤欲羹娘進匕大父  
出迎醫覩鑲講脈理咀嚼分嘗藥斟酌共量水自兒有  
知識日日見此事幾年舉場忙幾年絕域使忽忽三十  
年光陰迅彈指今日來拜墓兒旣鬚滿嘴兒今年四十  
大父七十九所喜頗聰強容顏類如舊週山看松柏不  
要攜杖走拜跪不須扶未覺躬偃僂挂珠碧霞犀猶是  
母所授鑣補炫錦雞新自粵西贖一手擎領髭一手振  
袍袖打鼓唱迎神紅氈齊泥首上頭熱紅香中間酌黃  
酒青箬苞黍粽紫絲絡蓮藕大父在前跪諸孫跪在后  
森森排竹筍依依伏楊柳新婦外曾孫是婆定婚媾阿  
端年始冠昨年已取婦隨兄擎腰扇阿和亦十五長樛  
次當孫此皆我兒女青青秀才衣兩弟名誰某少者新



簪花捧觴前拜手次第別後先提抱集賤幼一家盡偕  
來只恨不見母母在婆最憐刻不離左右今日母魂靈  
得依太婆否樹靜風不停草長春不留世人盡癡心乞  
年拜北斗百年那可求所願得中壽謂兒報婆恩此事  
難開口求母如婆年兒亦奉養久兒今便有孫不得母  
愛憐愛憐尙不得那論賢不賢上羨大父福下傷吾母  
年吁嗟無母人悠悠者蒼天

遣悶

花開花落掩關臥負汝春光奈汝何天下事原如意少  
眼中人漸後生多聲聲暮雨蕭蕭曲去去流光踏踏歌  
今日今時有今我茶烟禪榻病維摩

寒食

幾日春陰晝不成纔過寒食又清明霏霏紅雨花初落

嫋嫋白波萍又生欄外輕寒簾內暖竹中微滴柳梢晴  
浮雲萬變尋常事一瞬光陰既屢更

夜飲

長風吹月過江來照我華堂在手杯莫管陰晴圓缺事  
盡歡三萬六千回胸中五嶽撐空起眼底浮雲一掃開  
玉管銅絃兼鐵板與君扶醉上高臺

日本國志書成誌感

湖海歸來氣未除憂天熱血幾時攄千秋鑑借吾妻鏡  
四壁圖懸入境廬改制世方尊白統罪言我竊比黃書  
王船山集頻年風雨雞鳴夕灑淚挑燈自卷舒

十月十九日至滬初隨何大臣如璋使日本卽於是日  
由上海東渡今十二年矣

百年有幾相逢日一別重來十二年海水萍蹤仍此地

歲星荔實忽周天長江浪擊轟雲礮絕漠寒深大窖甑

公正南歸吾北上欲論近事恨無緣

子蟻先生自塞外賜環由滬來潮余

方由港往滬故差池不得相見

由潮州泝流而上駛風舟行甚疾

借得南風便無嫌上水船千帆張鳥翼一席盡鷗眠樹

若迎人立桅隨倚枕偏篙師相對語今夕且神仙

夜泊高陂其地多竹

一篷涼月冷於秋萬竹瀟瀟俯碧流欲擬勾留留不得

明年何處夢黃州

人境廬詩草卷五 終

民國十九年六月  
長孫能立重校印

人境廬詩草卷六

嘉應黃遵憲公度

自香港登舟感懷

又指天河問析津  
東西南北轉蓬身  
行行遂越三萬里  
碌碌仍隨十九人  
久客暫歸增別苦  
同舟雖敵亦情親  
龍旗獵獵張旌去  
徙倚闌干獨愴神

過安南西貢有感

滄海歸來伏著書  
平生豪氣未全除  
仰看跼跼飛鳶墮  
轉憶鄉人下澤車

高下連雲擁百城  
一江直溯到昆明  
可憐百萬提封地  
不敵彈丸一礮聲

神功遠拓東西極  
聖武張皇六十年  
不信王師倒戈退  
翻將化外棄南天

九真象郡吾南土秦漢以前旣版圖一自三楊倡議後  
珠崖永棄不還珠

班超投筆氣如山萬里封侯出玉關今豈無人探虎穴  
寶刀難染血痕殷

錫蘭島臥佛

大風西北來搖天海波黑茫茫世界塵點點國土墨雖  
曰中國海無從問禹跡近溯唐南蠻遠逮漢西域舊時  
職貢圖依稀猶可識自明遣鄭和使節馳絡繹凡百馬  
流種各各設重譯金葉鑄多羅玉環獻摩勒每以佛光  
明表頌帝威德蘇祿率羣臣淳泥挈盡室闐斑披繡縵  
扶服拜赤帟是雖蠻夷長竊號公侯伯比古小諸侯尙  
足稱蒲壁其他烏了部爭亦埒商舶有詔鎮國山碑立  
高百尺以此明德意比刻之眾石及明中葉後朝貢漸

失職豈知蕞爾國既經三四摘鐵圍薄福龍大半供鳥  
食我行過九真其次泊息力婆羅左右望羣島比蟻蝨  
咸歸西道主盡拔漢赤幟日夕興亡淚多於海水滴行  
行復行行便到獅子國

浩浩象口水流到旃伽山遙望窣堵波相約僧躋攀中  
有臥佛像丈六金身堅右疊重累足左握光明拳雖具  
堅牢相軟過兜羅絲水田脫淨衣髻雲堆華鬘大青髮  
屈蠡圍金耳垂環就中白毫光普照世大千八十種好  
相一一功德圓是誰攝巧匠上登忉利天刻此牛頭檀  
妙到秋毫顛或言佛涅槃婆羅雙樹間此卽荼維地斯  
語原訛傳惟佛有神力高踞兩山巔至今雙足迹尙隔  
十由延或言古無人只有龍鬼仙其後買珠人漸次成  
市塵此亦妄造語有如野狐禪實則經行地與佛大有

緣參天貝多樹由此枝葉繁獨怪如來身不坐千葉蓮  
既付金縷衣何不一啓顏豈眞津梁疲老矣倦欲眠如  
何沈沈睡竟過三千年

吁嗟佛滅度世界眼盡滅最先王舍城大闢禪師窟迦  
葉與阿難結集佛所說爾來一百年復見大會設恆河  
左右流槌槌聲不絕其後阿育王第一信佛法能役萬  
鬼神日造八萬塔舉國施與佛金榜國門揭九十六外  
道羣言罷一切復遣諸弟子分授十萬偈北有大月氏  
先照佛國月四開無遮會各運廣長舌漢家通西域聲  
教遠相接金人一入夢白馬來負笈繩行復沙度來往  
踵相躡總持四千部重譯多於髮華言通梵語衆推秦  
羅什後分律法論宗派各流別要之佉盧字力大過倉  
頡南有獅子王鑿字赤銅鑠當時東西商互通度人筏

但稱佛弟子能避鬼羅刹遂使諸天經滿載商人篋鳥  
喙郭子洲畏鬼性駭怯一聞地獄說心畏睽摩殺賴佛  
得庇護無異棲影鵠國主爭布金妃后亦托鉢尊佛過  
帝天高供千白氎樂奏梵音曲訟聽番僧決向來文身  
人太半著僧衲達摩浮海來一花開五葉語言與文字  
一喝付抹殺十年勤面壁一燈傳立雪直指本來心大  
聲用棒喝非特道家流附會入莊列竟使宋諸儒沿襲  
事剽竊最奇宗喀巴別得大解脫不生不滅身忽然佛  
復活西天自在王高踞黃金榻千百氎裘長膜拜伏上  
謁西戎犬羊性殺人日流血喃喃誦經聲竟能消殺伐  
藏衛各蕃部無復事鞭撻卽今奔巴瓶改法用金夾論  
彼象教力羣胡猶震懾綜佛所照臨竟過九洲闊極南  
到朱波窮北踰鞞鞞大東渡日本天皇盡僧牒此方護



佛齒彼土迎佛骨何人得鉢緣某日是箭節莊飾紫金  
塔供食白銀闕倒海然脂油震雷響金鉞香雲幢幡雲  
九天九地徹五百虎獅象遍地迎菩薩謂此功德盛當  
歷千萬劫有國賴庇護金甌永無缺豈知西域賈手不  
持寸鐵舉佛降生地一旦盡劫奪

我聞舒五指化作獅子雄能令衆醉象敗竄頭籠東何  
不勅獸王俾當敵人衝我聞恟大力手張祖王弓射過  
七鐵豬入地千萬重何不矢一發再張力士鋒我聞四  
海水悉納毛孔中蛟龍與魚鼈衆生無不容何不口一  
吸令化諸毛蟲我聞大千界一擊成虛空譬擲陶家輪  
極遠到無窮何不氣一噴散爲靉藍風我聞三昧火燒  
身光熊熊千眼金剛杵頭出烟焰紅何不呼阿奴一用  
天火攻我聞安息香力能勅毒龍尾擊須彌山波濤聲

洶洶何不呼小婢悉遣河神從我聞阿脩羅橫攻見善  
宮流盡赤蚌血藕絲遁無蹤何不取天仗壓制羣魔凶  
我聞毗琉璃素守南天封薜荔鳩盤荼萬鬼聲喁喁何  
不飭鬼兵力助天王功惟佛大法王兼綜諸神通聲聞  
諸弟子遞傳術猶工如何斂手退一任敵橫縱竟使清  
淨土概變腥膻戎五方萬天祠一齊鳴鼓鐘遙望西王  
母虎齒髮蓬蓬合上皇帝號萬寶朝河宗佛力遂掃地  
感嘆摧肝胸

佛不能庇國豈不能庇教奈何五印度竟不聞佛號古  
有韋陀書云自梵天造貴種婆羅門挾此肆凌傲凡夫  
鈍根輩分定莫能校自佛倡平等人各有業報天堂與  
地獄善惡人所召卑賤衆首陀吹螺喜相告亦有婆羅  
門漸漸服教導食屑鵝鳩行夜行鵠鷄叫塗灰身半裸

拜月脚左蹠各棄事天業迴向信三寶大地閻浮提慈  
雲徧覆幬何意梵志輩勢盛復鼓噪灰死火復然尾大  
力能掉別創溫都名布以人皇詔佛頭橫著糞訶罵雜  
嘲誚盡驅出家人一。一出邊徼外來波斯胡更立祆神  
廟千牛祭火光萬馬拜日曜嗣後摩訶末採集各經要  
一經衍聖傳一劍鎮羣暴謂此哥羅尼實以教忠孝天  
使乘白馬口宣天所誥從則升九天否則殺左道教主  
兼霸王黃屋建左纛繼以蒙古主挾勢尤桀驁以彼轉  
輪王力大誰敢較邇來耶穌徒徧傳新舊約載以通商  
舶助以攻城礮謂天只一尊獲罪無所禱一切土木像  
荒誕盡可笑頂上舍利珠拉雜付摧燒竟使佛威德燈  
滅樹傾倒摩耶撫鉢哭迦葉捧衣悼像法二千年今日  
末劫到惡王魔波旬更使衆魔燒天人八部衆誰不生

悲惱

噫嗟五大洲立教幾教皇惟佛能大仁首先唱天堂以  
我悲憫心置人安樂鄉古分十等人貴賤如畫疆惟佛  
具大勇自棄銅輪王衆生例平等一律無低昂罪畏末  
日審報冀後世償佛說有彌勒福德莫可當將來僧祇  
劫普渡胥安康此皆大德慧傾海誰能量古學水風火  
今學聲氣光辯才總無礙博綜無不詳獨惜說慈悲未  
免過主張臂稱窮餒肉身供餓虎糧左手割利刃右手  
塗檀香冤親悉平等善惡心皆忘愈慈愈忍辱轉令身  
羸尪獸蹄交鳥迹一聽外物戕人間多虎豹天上無鳳  
凰虎豹富筋力故能恣彊梁鳳凰太文彩毛羽易摧傷  
惟彊乃秉權彊權如金剛吁嗟古名國興廢殊無常羅  
馬善法律希臘工文章開化首埃及今亦歸淪亡念我

亞細亞大國居中央堯舜四千年聖賢代相望大哉孔  
子道上繼皇哉唐血氣悉尊親聲名被八荒到今四夷  
侵盡徹諸邊防天若祚中國黃帝垂衣裳浮海率三軍  
載書使四方王威鎮象主鬼族馴狼隍歸化獻赤土頌  
德歌白狼共尊天可汗化外胥來航遠及牛賀洲鞭之  
如羣羊海無烈風作地降甘露祥人人仰震旦誰侮黃  
種黃弱供萬國役治則天下強明王久不作四顧心茫  
茫

溫則宮朝會

萬燈懸耀夜光珠繡縷黃金匝地鋪一柱通天銘武后  
三山絕島勝方壺如聞廣樂鈞天奏想見重華益地圖  
五十餘年功德盛女媧以後世應無

重霧

碌碌成何事有船吾欲東百憂增况瘁獨坐屢書空霧  
重城如漆寒深火不紅昂頭看黃鵠高舉挾天風

倫敦大霧行

蒼天已死黃天立倒海翻雲百神集一時天醉帝夢酣  
舉國沈迷同失日芒芒蕩蕩國昏荒冥冥蒙蒙黑甜鄉  
我坐斗室幾匝月面壁惟拜燈光王時不辨朝夕地不  
識南北離離火焰青漫漫劫灰黑如渡大漠沙盡黃如  
探巖穴黝難測化塵塵亦縑望氣氣皆墨色象無可名  
眼鼻若并塞豈有盤古氏出世天再闢又非阿脩羅攪  
海水上擊忽然黑暗無間墮落阿鼻獄又驚惡風吹船  
飄至羅刹國出門寸步不能行九衢徧地鈴鐸聲車馬  
雞棲匿不出樓臺蜃氣中含腥天羅磕匝偶露缺上有  
紅輪色如血曖曖會無射日光涼涼未覺炙手熱吾聞

地球繞日日繞球今之英屬徧五洲赤日所照無不到  
光華遠被天盡頭烏知都城不見日人人反抱天墜憂  
又聞地氣蒸騰化爲雨巧算能知雨點數此邦本以水  
爲家况有竈煙十萬戶倘將四海之霧銖積寸算來或  
尙不如倫敦城中霧  
在倫敦寫真誌感

人海茫茫着此身蒼涼獨立一傷神遞增哀樂中年感  
等是尋常行路人萬里封侯從驃騎中興名相畫麒麟  
虎頭燕領非吾事何用眉頭鬱不申

得梁詩五書

廿年蹤跡半天下數盡新交總不如四海幾人眞我友  
萬金一紙當家書相期雲漢高飛鵠難忘江湖同隊魚  
事事蹉跎落人後可堪君尙逐前車

余得拔萃後四年  
舉於鄉詩五亦如

之余常以此爲戲

今別離

別腸轉如輪一刻既萬周眼見雙輪馳益增中心憂古亦有山川古亦有車舟車舟載離別行止猶自由今日舟與車併力生離愁明知須臾景不許稍綢繆鐘聲一及時頃刻不少留雖有萬鈞柁動如繞指柔豈無打頭風亦不畏石尤送者未及返君在天盡頭望影倏不見煙波杳悠悠去矣一何速歸定留滯不所願君歸時快乘輕氣球

朝寄平安語暮寄相思字馳書迅已極云是君所寄旣非君手書又無君默記雖署花字名知誰箝緡尾尋常並坐語未遽悉心事况經三四譯豈能達人意只有班班墨頗似臨行淚門前兩行樹離離到天際中央亦有



絲有絲兩頭繫如何君寄書斷續不時至每日百須臾  
書到時有幾一息不相聞使我容顏悴安得如電光一  
閃至君旁

開函喜動色分明是君容自君鏡奩來入妾懷袖中臨  
行剪中衣是妾親手縫肥瘦妾自思今昔得毋同自別  
思見君情如春酒濃今日見君面仍覺心忡忡攬鏡妾  
自照顏色桃花紅開篋持贈君如與君相逢妾有釵插  
鬢君有襟當胸雙懸可憐影汝我長相從雖則長相從  
別恨終無窮對面不解語若隔山萬重自非夢來往密  
意何由通

汝魂將何之欲與君追隨飄然渡滄海不畏風波危昨  
夕入君室舉手搴君帷披帷不見人想君就枕遲君魂  
倘尋我會面亦難期恐君魂來日是妾不寐時妾睡君

或醒君睡妾豈知彼此不相聞安怪常參差舉頭見明月明月方入扉此時想君身侵曉剛披衣君在海之角妾在天之涯相去三萬里晝夜相背馳眠起不同時魂夢難相依地長不能縮翼短不能飛只有戀君心海枯終不移海水深復深難以量相思

憶胡曉岑

一別匆匆十六年雲龍會合更無緣隔鄰呼飲記同巷積歲勞思客一箋無數波濤滄海外何時談話酒杯前太章走遍東西極天外瀛洲別有天

感事三首

酌君以葡萄千斛之酒贈君以玫瑰連理之花飽君以波羅徑尺之果飲君以天竺小團之茶處君以琉璃層累之屋乘君以通幘四望之車送君以金絲壓袖之服

延君以錦幔圍牆之家紅氍貼地燈耀壁今夕大會來  
無遮褰裳攜手雙雙至仙之人兮紛如麻繡衣曳地過  
七尺白羽覆髻騰三叉襜褕乍解雙臂袒旁綴纓絡中  
寶珈細腰亭亭媚楊柳窄靴簇簇團蓮華膳夫中庭獻  
鍾乳樂人階下鳴鼓笳諸天人龍盡來集來自天漢通  
銀查衣裳闌斑語言維康樂和親懽不譁問我何爲獨  
不樂側身東望三咨嗟

吾聞弇州西有西極國積蘇累塊杳無極又聞昆侖山  
高萬餘里增城九重天尺咫此皆鈞天帝所都聚窟亦  
屬神仙徒元洲長洲本幻渺丹水赤水疑有無又聞西  
方大秦國遠軼南海波斯胡水晶作柱夜光絡繹織  
罽黃金塗犁耆善眩雖略妄張騫鑿空原非誣談天足  
徵鄒子說益地亦列王母圖東西隔絕曠千載列國蟬

興強百倍道通南徼仍識途舟繞大郎竟超海衣裳之  
會繼兵車跂行輟動同一家穆滿轍迹所不到今者聯  
翩來乘槎吁嗟乎茫茫九有古禹域南北東西盡戎狄  
豈知七萬餘里大九州竟有二千年來諸大國

地球渾渾周八極天設區域限西北繩行沙度不可涉  
黑風况畏羅刹國咄哉遠人來叩關鑿地忽通西南蠻  
賈胡竟到印度海師船還越大浪山婆羅蘇祿吾南土  
從此漢陽咸入楚長蛇封豕恣併吞喁喁鸛鵲來無路  
可崙比亞尤人豪搜索大地如追逃裏糧三月指西發  
極目所際惟波濤行行匝月糧且罄舟人欲殺鬼夜號  
忽然大陸出平地一釣手得十五鼇卽今美洲十數國  
有地萬里民千億世人已識地球圓更探增冰南北極  
精衛終償填海志巨靈竟有擘山力華嚴樓閣雖則奇

滄海桑田究難測堂堂大國稱支那文物久冠亞細亞  
流沙被德廣所及卻特威遠蔑以加宋明諸儒鴛虛論  
徒詡漢大誇皇華謬言要荒不足論烏知壤地交犬牙  
鄂羅英法聯翩起四鄰逼處環相伺着鞭空讓他人先  
臥榻一任旁側睡古今事變奇至此彼已不知寧勿恥  
持被入直刺刺語不休勸君一聘四方志

寄懷左子興領事 秉隆

古人材藝今俱有卻是今人古不如十載勳名輔英簜  
一家安樂寄華胥頭銜南島蠻夷長手筆西方象寄書  
聞說狂歌敲鐵板大聲往往駭龍魚

送承伯純厚吏部東歸

他日是非誰管得當前聚散亦飄蓬茫茫海水搖天綠  
說到歸心諒總同

歲暮懷人詩

三年秉節輝英蕩萬里持戈老玉門太息韓江流水去

近來心事共誰論

何子峨  
官詹

卅年冷署付蹉跎歸去空山臥薜蘿寫到哀辭哭金鹿

黃門老淚定無多

潘孺初  
戶部

既死奸諛膽尙驚四夷拱手畏公名一篇薦士通天表

獨爾憐才到鰕生

鄧鏤香  
鴻臚

門第將軍雙戟圍長安花好馬如飛只憐同聽秋聲館

瘦竹疎桐鶴不肥

志伯愚官詹  
仲魯編修

祭酒今爲天下師帝堯苗裔漢官儀文星光照銀潢水

流到人間萬派奇

盛伯熙  
祭酒

要使天驕識鳳麟傳聞星使出詞臣氎裘大長驚相問

李揆中朝第一人

李仲約  
侍郎

島夷史讀吾妻鏡清廟書傳我子篇寫取君詩圖我壁

自誇上下五千年

文芸閣編修

自笑壺邱懾鄭巫有時彈指說蘭閣四朝盟會文山積

排比成書有意無

袁爽秋戶部

十載承明校石渠搜羅七錄更無餘傳聞大典藏蠻貊

欲訪人間未見書

王載鄉戶部

天竺新茶日本絲中原爭利漸難支相期共煉補天石

一借丸泥塞漏卮

陳次亮戶部

懷仁久熟坤輿志法顯兼通佛國言聞說荷囊趨譯館

定從絕域紀輜軒

沈子培戶部

典屬從公欲請纓嚇蠻草詔喜談兵迷雲毒霧飛鳶墜

曾佐星軺萬里行

楊虞裳刑部

漢學昌明二百年儒林中有婦人賢絳紗傳授宣文業

自詡家姑王照圓

王蓮生編修

天邊雄鎮北門管海內通儒東塾書膝下傳經幕中檄

數君才調有誰如

于晦若戶部

釋之廷尉由參乘博望封侯自使槎官職詩名看雙好

紛紛冠蓋遜清華

張樵野廷尉

一疏尊崇到許君壁中古字發奇芬郎亭弟子湖州法

諷籀人人解說文

汪柳門侍郎

粉署歸來作畫眠花磚徐步日如年不知新舊唐書注

紅燭增修得幾篇

唐春卿侍講

赤嵌城高海色黃乍銷兵氣變文光他年番社編文苑

初祖開山天破荒

邱仙根工部

老去頭陀深閉關悔將游戲到人間楊枝駱馬今都去

負杖閒看烏石山

龔蘭人方伯



百人同隊試青衫記得同歌宵雅三上溯乾嘉數毛鄭  
瓣香應繼著花菴

溫慕柳  
檢討

高柳深深閉戶居看兒畫扇婦鈔書著書注到萍蒲懶  
恨不將身化作魚

胡曉岑  
明經

結客須結少年場占士能占男子祥二十年前贈君語  
於今憔悴鬢微霜

賴雲芝  
孝廉

走徧環球西復東純鱸歸隱臥吳淞可憐一副傷時淚  
灑盡吞花臥酒中

王紫銓  
廣文

十洲三島浮槎去汗漫狂游久未還輸與清閒陽朔令  
朝朝拄笏飽看山

陳雁皋  
明府

聞君近入焦山去欲訪要離伴伯鸞一箇蝸廬置何處  
漫山風雨黑如磐

梁星海  
太常

娓娓清談玉屑霏仲宣體弱不勝衣十年面壁精勤甚

多恐量腰減帶圍

黃仲韜編修

骨肉凋零感慨多玉關人老鬢微皤金壺自寫神傷賦

每念家山輒奈何

許竹簣星使

教兒兼習蟹行字呼婢閒調馱舌音十載蓬萊作仙吏

公庭花落屋廬深

楊星垣觀察

珠江月上海初潮酒侶詩朋次第邀唱到招郎弔秋喜

桃花間竹最魂銷

陳乙山工部

石鼓摩挲拜孔林每談佛性說仙心赤松辟穀知難學

要學先生戲五禽

鍾子華茂才

拔萃簪花十五餘傾城看殺好頭顱不知今日靈和柳

猶似當年張緒無

陳再薌明經

風雨寒更守一廬墓門夜夜泣啼烏多情人慣傷心語

更譜哀絃十斛珠

劉少蕓秀才

十七年來又悼亡續絃仍復譜求皇纍纍四十羅敷喜  
摩挲郎須細看郎

梁詩五  
孝廉

兩兩鴛鴦挾鳳雛調羹食性各諳姑一家壽母紅氍毹拜  
最羨君家家慶圖

梁輯五  
孝廉

新聲五十瑟絃調愛我詩曾手自鈔遠隔蓬山思甲帳  
此生無福比文簫

悲歡離合無窮事迢遞羈危萬里身與我周旋最憐我  
寒更孤燭未歸人

### 春遊詞

垂柳含春春意多幾分婀娜幾婆娑車聲怒馬塵黃麴  
橋影橫虹水綠波並坐競誇中婦艷緩歸爭唱少年歌  
黃雞白日堂堂去欲喚玲瓏奈老何

鬱鬱

鬱鬱久居此依依長傍人梨花今夜雨燕子隔年春門  
掩官何冷燈孤僕亦親車聲震牆外滾滾盡紅塵

### 登巴黎鐵塔

塔高法國三百邁突當中國千尺人力所造五部洲  
最高處也

拔地崛然起峻崢矗百丈自非假羽翼孰能躡履上高  
標懸金針四維挂鐵網下豎五丈旗可容千人帳石礎  
森開張露闕屹相向遊人企足看已驚眼界創懸車倏  
上騰乍聞轆轤響

登塔者皆坐飛車旋引而上

人已不翼飛迥出空

虛上並世無二尊獨立絕依傍即居最下層

登眺之處分爲三層

其最下層高五十邁突當中國十六丈四尺

高已莫能抗蒼蒼覆大園森芒

列萬象呼吸通帝座疑可通肝蠻自天下至地俯察不  
復仰但恨目力窮更無外物障離離畫方罫萬頃開沃

壤微茫一線遙千里走河廣宮闕與城壘一氣作蒼莽  
不辨牛馬入沙蟲紛擾攘我從下界來小大頓變相未  
知天眼闢么麼作何狀北風冰海來秋氣何颯爽海西  
數點烟英倫鬱相望緬昔百年役西歷一千三百餘年  
法國絕嗣英王以法  
王四世非立外孫欲兼王法國法人不允遂開戰爭凡九十餘年世謂之百年之役裂地爭霸王  
驅民入鋒鏑傾國竭府帑其後拿破崙蓋世氣無兩勝  
尊天單于敗作降王長歐洲古戰場好勝不相讓卽今  
正六帝各負天下壯等是蠻觸爭紛紛校得喪嗟我稊  
米身尪弱不自量一覽小天下五洲如在掌旣登絕頂  
高更作凌風想何時御氣游乘球恣來往扶搖九萬里  
一笑吾其儻

蘇彝士河

龍門竟比禹功高亙古流沙變海潮萬國爭推東道主

一河橫跨兩洲遙破空推鑿地能縮銜尾舟行天不驕  
他日南溟疏闕後大鵬擊水足扶搖

南美洲之巴拿馬方疏鑿未畢

九月十一夜渡蘇彝士河

雲斂天高暑漸清沈沈魚鑰夜三更侵衣雪色添秋冷

繞檻燈光混月明

夜渡此河皆於船頭置電燈光照數十里兩岸沙堆皎潔如雪

大漠

徑從沙磧度雙輪徐碾海波平忽思十五年前事曾在

蓬萊島上行

日本南海道播磨峽中亦兩岸相接而山水清雅令人移情丁丑冬過此

舟泊波塞是夕大雨蓋六月不雨矣

流沙互千里絕塞比龍堆飛隼盤雲去明駝載水來破  
荒三尺雨出地一聲雷溽暑都銷盡當風殊快哉

人境廬詩草卷六終

民國十九年六月  
長孫能立重校印